



Sesida dals

Communitgà ils

Protocol nr.

23 da zercladur 2026

24 da zercladur 2026

457/2026

Dumonda Censi

davart permissiuns da dimora, la criminalitad organisada ed instruments preventivs:
Tge pratica per il chantun Grischun?

Resposta da la Regenza

Il Cussegl federal ha approvà il december 2025 l'emprima strategia da la Svizra per cumbatter la criminalitad organisada. Ella è la basa, per che tut ils plauns statals fetschian frunt en moda efficazia e sin plaun interinstituziunal a la smanatscha creschenta tras las raits criminalas. Ella è vegnida elavurada sut la direcziun dal fedpol ensemen cun la Confederaziun, ils chantuns e las vischnancas. La strategia determinescha champs d'acziun per identifitgar, impedir e cumbatter la criminalitad organisada. Sin plaun chantunal ha la Regenza gia mess il 2024 in accent tar la Polizia chantunala cun il punct central da svilup PS 4.1 «Cumbat cunter la criminalitad organisada» en il Program da la Regenza 2025-2028. En coordinaziun cun la strategia federala vegn quest accent ussa extendì e realisà en autras autoritads chantunalas e communalas. I vegn reglà, tgi che ha tge spazi d'agir per identifitgar, impedir e cumbatter la criminalitad organisada. Ultra da quai duain vegnir proponidas mesiras pussaivlas, sco per exempel eventualas adattaziuns da leschas. I duai vegnir mussà, tge che vegn gia oz realisà e tge ch'ins po rinforzar cun las resursas existentas sco er tge resursas ch'i duvrass per realisar mesiras supplementaras.

Tar la dumonda 1: En cas da grevas condemnaziuns pervia da criminalitad organisada e sch'i dat supplementarmain infurmaziuns da la polizia, èn mesiras d'allontanament er permessas envers burgaisas e burgais da la UE / AECL. La premissa è ch'il cumportament persunal da la persuna pertutgada saja ina periclitaziun efectiva, actuala e greva avunda per la segirezza publica e per l'urden public, che las mesiras sajan adequatas e ch'ina dretgira penala n'haja betg desistì d'ina expulsion penala per il medem malfatg.

Tar la dumonda 2: Per il mument datti cunter tut las quatter personas arrestadas che han ina permissiun en il Grischun, ina procedura per *revocar* las permissiuns da dimora. Il UMDC è en contact cun las autoritads federalas. Sulettamain il SEM resp.

il fedpol pon decretar *scumonds d'entrar en Svizra*. Plinavant po il fedpol er pronunziar *expulsiuns*. En il rom da la concessiun da la permissiun ha il UMDC examinà las premissas en concordanza cun il dretg vertent. Questas premissas eran ademplidas tenor il stadi d'enconuschientschas da quella giada. Il UMDC ha pli tard tuttina examinà la revocaziun. Pervia da las pretensiuns giuridicas severas n'avess ina tala dentant betg tegnì pitg ad in'examinaziun giudiziala.

Tar la dumonda 3: In barat d'infurmaziuns tranter ils chantuns datti gia oz en il rom dal barat da dossiers tar chaschuns respectivas. Las infurmaziuns ed ils codes en il SIMIC vegnan per regla deponids ad uras. Daco che quai n'è betg vegnì fatg immediat en il cas qua avant maun, n'è betg enconuschent a la Regenza. Las autoritads èn dentant sensibilisadas. Il tema vegn er discutà a la sesida dals uffizis chantunals da migraziun. La collavuraziun cun il chantun Tessin funcziunescha dal rest fitg bain.

Tar la dumonda 4: La criminalitad organisada nizzegia structures da l'economia legala. Ella emprova da survegnir access ad immobiglias, a la gastronomia, a l'industria da construcziun e.u.v. sur structures da firmas apparentamain legalas. Perquai cumenza il cumbat cunter la criminalitad organisada gia, cura ch'i vegnan messas a disposiziun adressas per firmas da chaschas da brevs, tar controllas administrativas, en proceduras da permissiun e.u.v. Las vischnancas èn savens l'emprim plaun statal che percorscha las singularitads. Ellas ston ademplir consequentamain lur cumpetenzas en il sector administrativ, en il dretg da sorveglianza ed en connex cun las permissiuns, p.ex. permissiuns da mastergn e da manaschi, dumondas da construcziun, permissiuns d'ustaria e d'hotellaria, la locaziun d'immobiglias communalas, annunzias da l'agid social e da domicil. Las vischnancas èn pia in factur essenzial per identifitgar ed impedir la criminalitad organisada e per annunziar irregularitads als posts cumpetents. In barat structurà tranter las autoritads chantunals e communalas gida a la prevenziun. Perquai èsi planisà d'integrar pli fitg las vischnancas e – suenter la Maisa radunda mez matg 2026 en la Mesolcina – er d'extender quai sin l'entir chantun. Ils process respectivs vegnan optimads vinavant, ma las perscripziuns giuridicas e la protecziun d'investigaziuns currentas ston restar garantidas da tut temp.

Tar la dumonda 5: Guardar remartgas introductivas.

Tar la dumonda 6: Guardar respostas a la dumonda 4.



En num da la Regenza

Il president:

Martin Bühler

Il chancelier:

Daniel Spadin